

四庫全書

集部

欽定四庫全書

集部

元詩選初集卷二十三

詳校官中書臣王鵬

主事銜臣徐以坤覆勘

總校官編修臣王燕緒

校對官檢討臣溫常綬

謄錄監生臣吳朝倫

欽定四庫全書

元詩選初集卷二十二

庶吉士顧嗣立編

貢集賢奎

奎字仲章寧國路宣城人自少以文學名檄為
池州路齊山書院山長秩滿授太常奉禮郎擢
應奉翰林文字兼國史編修延祐初遷江西等
處儒學提舉入為翰林待制至治初以母年垂
九十謁告歸益治園池蒔花木築亭曰愛日兄

弟奉母游宴其間鄉人榮之泰定中母憂服闋
拜集賢直學士天歷改元命代祠北岳濟淮南
鎮其明年春還自會稽以疾歸故里之南湖至
秋疾愈十月朔旦蚤作謂猶子師文曰吾夜夢
作詩有竹樹蕭蕭夾泉石之句其末云几轉丹
成生羽翼是何祥也語已泊然而逝年六十一
贈翰林直學士追封廣陵郡侯謚文靖仲章為
文閣放僞傀不狃卑近大德中朝廷方議行郊

祀禮諸大臣以仲章識鑒清遠引置禮屬多所
討論其在詞林與元復初袁伯長鄧善之馬伯
庸王繼學虞伯生輩相唱和皆一時豪俊聲名
之士晚年萃擷諸禮書欲定為一家言而未竟
所著詩文有雲林小藁聽雪齋紀青山漫吟倦
游集豫章藁上元新錄南州紀行凡百二十卷
悉藏在秘府明弘治間曾孫吏部郎元禮編其
所存者曰雲林詩集刊行於世

避暑

避暑北山下修篁夾林陰客來澹忘言稍覺清我心酷
暑尚可避酷吏不可禁迹絕畏途輟涼飈散塵襟却嗟
避名者猶恨山未深為言暑與吏縱酷何能侵

敬亭山

名山鎮宣郡古祠崇敬亭傑構靚深巖飛廊引重扃陟
彼百仞高始覺萬類形樓殿勢益弘兵衛森幽靈增秩
觀隆典綸音播明廷豐穰走祈報烟燎浮芳馨竹樹蔽

陰壑虛闌俯南垞麻姑湖上碧華陽天際青神颺颺然
起新涼濯微醒疎雨映白石垂虹截蒼冥永言李謝游
豈惜歲月零悠悠孤雲去渺渺從雙轡招之殊未來莊
思展箇經

答陳華仲二首

海上三神山上有學仙侶泠泠紫簫聲吹作飛鳳語迴
颺蕩溟海散落成烟雨豈無知音者一振九苞羽持之
獻天庭上以奉明主

貧賤交有道富貴多異途所以古君子擇交嚴所趨霜
劍間寶室烈士發長吁隔世或相慕同居分越吳寥寥
千載間羨彼管鮑徒

夢故人

千里萬里道三年二年別鴻雁去復來我友音書絕夢
中忽一見欸語情更切覺來失處所殘釭半明滅相思
各天涯長夜寒慄冽風霜草木變貧賤不易節中心諒
誰知素月當空潔

題董簡卿所藏瀟湘圖

瀟湘在何處展卷心悠然是中有雲飛上與蒼梧連憶
昔弄扁舟載雪清江天湘君招不來明月墮我前微鐘
破征夢落雁棲寒烟回首行萬里攬衣羨孤寨可憐楚
人辭憔悴窮歲年圖畫豈不好此意誰復傳已矣三嘆
嗟臨風叩商絃

夜坐二首

京國雨初霽虛堂夜氣涼新月上團團坐久流清光露

葉閃明晦河雲互飛揚機籟發天秘起弄琴與觴千里
同今夕幽愁結中腸溼螢低復舉棲鳥亦驚翔適時物
乃貴人生何慨慷

夜久境逾靜居然庭樹秋氣機發羣動時節無淹留涼
露浴蟾彩浮雲澹河流微生競如髮彌思志常周精爽
一以竭榛烟蔽前丘道貴善持養日入當偃休寄言學
仙子文字徒冥搜

雪晴

今晨持我書燕坐雪照屋閉門謝塵鞅展卷自朗讀衆
說初若攻冥思意纔復旭日上團團清泉渙春綠涓涓
晴欄溜洗眼濺飛瀑宜不事游觀驅車泥及腹永懷同
袍士歲晚在空谷好風忽東來起玩庭前竹

送夾谷伯敬之官單父

燕州連日雨六月寒裝綿閉戶斷車轍修途溢如川朝
晴悅物性槐陰起初蟬衣篝曝餘潤照眼階葵鮮聞君
去儀曹五馬行翩翩緬懷古單父高堂坐鳴絃政理日

以媮寶此千載賢矧此薦歲饑夏潦仍相緣嗷嗷東南
州流移踵車船死者相枕藉羸瘠甘棄捐民命懸守令
壅遏誰當憐君懷策世才往哉寄承宣譬彼善牧者鞭
擊非所先戴星亦有人何乃任力專淒涼二子遠故老
應相傳我昔嘗經游土風尚熙然迴河抱阡陌桑麻綠
浮烟豈無稌稻區草木紛華妍維茲重責任慎彼澆俗
遷會徵太史書家聲振當年

和袁伯長冬至燕集韻

黃鍾起葭琯玉樹華寶宴清交寡常流鏗辭表時彥盈
盈勸浮蛆裊裊簪綵燕雅服稱儀新嘉疏列鄉薦香銷
神用舒綦覆心罷戰培花候奇識煮茗遂清咽虛幌雲
度英空簷水落線永言悅書玩亦豈慕盤饌塵踪合浮
萍芳歲惜流箭念此遠道逢故人久懷羨

題陳氏所藏著色山水圖

獨卧曉慵起夢中千萬山推窗烟雲滿一笑咫尺間
媚媚美人妝金碧粲并鬟素波淨如鏡綠蘋點溪灣美哉

筆墨工貌此意度閒孤禽立圓沙漁舟遠來還我方厭
闌市坐對忘朝餐安得林下扉深居長掩關

秋日陪大學士趙公憩龍山玄真宮

巖巖居庸關左挾飛仙居蒼茫四山合石徑穿盤紆人
家稍相接林木何森數觚稜生曉烟玄風凌紫虛念彼
羽流集豈與世俗俱溪流轉雲碾餘潤分園蔬鐘磬答
空谷齋供薦芳腴穹碑紀宗傳道一教乃殊素餐貴崇
本卒歲事耕鋤漁父在何許空有桃花株坐慚秉文翰

尸祿常曠迂日莫陟曾巔丹霞成長裾遙睇空中雲超
然能卷舒

登齊山

出郭行五里落日衆山赤中環翠凝巒秀色起千尺風
流杜牧守壯語鐫妙畫我來嚴冬初俛仰一今昔人烟
久變故鬼怪據幽僻披叢得小徑往來遭折屐亂石排
犬牙荒洞泯龍迹空餘巖前碑雨日自淋炙黃花既非
時何以供太白但須歷曾巔一笑天地窄

茶蘼架

西園檢春事積雨斷餘紅茶蘼壓高架皎皎晚日烘翠
蔓點殘雪清香度微風幽人對之坐瑩然此心同徘徊
不忍去片月來高空宛如萬玉娥素袖舞雲中珠璣露
顆綴翠珮烟光籠愛花不受折枝柔刺盈叢攜酒醉其
下慰此良夜終

宿鳳口會九萬兄

扁舟下滄溟日莫浮雲散青山袞袞隨十里行不斷古

塵集人烟艤纜臨絕岸誰知兄弟情邂逅忽相見篙師
輕波濶呼嘯驚夜半貪程慮涉險欲往還自筭推篷視
天宇白露下凌亂衆星亦已沒落月破微暗念此局促
身倏然重三歎

登虎丘山

古士雅巾屨具舟約芳遊朝晴出西郭午涼登虎丘松
徑度遙嶺歷此層級修當時吳王劍斨光裂巖幽平甸
眺萬頃閒瞻烟樹稠頗聞山僧賢飛錫下林取獨遺方

大室於焉集清流一簾可平生豈惜半日留煮茗試泉
冽焚香延宿簞疎雨催晚歸溪波散浮漚

河上阻風次韻袁伯長

奔河逆牽舟北風忽中阻篙師勇支撐騰躍勢如舞塵
沙晦高旻泥水汙后土電飛起潛蛟樹拔亂驚羽須臾
西日霽雲端散紅縷維此造化工而我獲窺覩故人適
同懷破險出奇語明朝穩張帆萬里端自許

貴州

扁舟放河流驟暑消雨餘既忻歸計諧矧與佳士俱雲
霧重迴首蔥龍鬱瑤居微波散碧縠簸蕩明月珠風急
帆滿張獵獵病股舒亞樹花換葉離巢燕將雛眷彼別
時語不知今何如簡書豈足畏青山念吾廬勿謂道路
遙坐覺山川驅華樽方自持相思少歡娛緘情何以寫
攬袂起踟躕

送九萬兄之樂清主簿

宿雲澹朝暎春風散輕寒振衣既行邁慘別情所難王

事勞蹇蹇征車戒桓桓孰云枳棘微蔚此五采翰海縣
還靡俗濤江激迴瀾道路豈不遙襄居誠匪安勗哉西
都秩願言繼彈冠

送俞元明之官仙居縣

赤城離東南蒼巖間石扉靈槎截塵界曉日明烟霏古
稱神仙居欲往事已非林樹蔽野縣空街行迹稀之子
萬里役黃塵手頻揮辛苦事科舉一笑辭布衣我公得
茲地扁舟愜南歸訟簡民俗淳官清吏仍飢荒庭齧瘦

馬鈎簾燕交飛健筆凌青雲江梅素英蜚性靜恒自安
諺辭速羣譏士生亦樂樂矧以友道微持罇贈遠別矢
心諒無違

送張謙仲南臺御史

仲夏炎氣盛江河沸焦燉層雲張虛傘電光掣金鰲旱
魃奮為虐九土民嗷嗷矧茲東南區颶風挾驚潮漂流
孰可禦弊積成瘵凋側聞我豸冠遠策神驄騎冰檠期
素守風霜厲嚴操譬若激清泠慰彼方渴消憂私隱田

里吏牘上下膠要當得其情察察窮秋毫金陵古佳麗
地控荆楚遙翠柏集飛鳥蒼鷹擊秋郊臺端咫尺天明
月手可招勗哉重名德山岳非云高

雜言四首

舉世稱伯樂顧馬價倍增價增馬何益夙負千里能飢
飽燕山雪渴飲瀚海水但令遂真性超逸非所矜
楚岡產至寶草木為華滋一朝獻君門借問識者誰居
然則其足九死終不移枯榮祇自辱造物真知

孤桐挾風雨斃此龍關爭棄置百年後斲琴發清聲昔
為溝中斷今作膝上橫寵榮亦既美曷若能全生
鳳飢作琅玕飛鳴以其時儀羽人不識寄迹蒼梧枝城
臬飽腐鼠自得謂過之貴賤詎不分杳矣隨所宜

送史高士謁吳閭閒

春水武昌船帆飛敬亭雨孤城厭喧囂聽此檣燕語揮
手謝時人開胃散煩暑煌煌闕下書曳曳雲間侶真人
紫霞佩執簡授璇宇攬衣欲從之神交諒傾許霽雨沐

霄容風微鵠初舉游心愜高明脫屣邁行旅懷哉會何時酌彼盈尊醕

度呂梁洪

朝發下邳山黃流汴迢迢呂梁開險關懸河傾奔號南
通廣越疆琛貢來千艘連檣駐其下祈賽聲啁嘈岡環
岸勢側廟奠巖陰高橫灘絕東注亂石不可篙嶙峋布
戈戟屈曲蟠蚪蛟湍飛稍旁激盤渦散驚濤修纜危一
綫千鈞泛鴻毛凌虛獨凝睇屹若登雲霄寒雲暗腥蟄

落日搖金鰲我老才氣薄搜吟愧前豪神京望何極輕
颿競羣飄

沙河

沙河冬欲涸流淺日以急膠舟不可行念此勞苦劇巨
艦魚貫尾小艇纔轉折褰裳力推挽進寸還退尺呼嘯
畚林谷蕩摩激沙石前瞻充泗源高堰限通塞啟牖暴
漂浮絕岸駭平溢篙檣起紛拏跳躍如奮敵安流心稍
舒十里慰行役舟人忽相告上牘晚仍隔官程急方貢

陸輦空委積永念平水功豈遂一朝適壯游俟時來欲
速非我力郊連秋草黃日閃霜樹赤孤村隱溪曲聊以
供散策白雲山嵯峨矯首三歎息

河流水

十月寒氣盛長河流冰漸征艎泝浩浩鉤曲苦遼遲滯
漾圭角露稍汨還參差恍疑戈戟森出沒相傾敔或員
如墮礮或利如鈇鉞須臾驟風激瓊瑤積山危檣櫂一
衝擊糜爛不可支窮陰生極底乃見造化奇履霜固知

堅物序矧及期行役何未已君子宜慎思豈無冠蓋華
揮霍遵大遠千鈞載車轂絡繹駟馬馳覆前固戒險隕
身悔何追我昔居南州感此目未窺竭來二十年戰兢
常自持終當挂高帆春洲拂綠漪

讀馬伯庸學士止酒詩

今晨不可出大風吹我帷陋巷泥沮如空墻雨淋漓研
朱課兒書冥思解羣疑敲門童子來袖有止酒詩讀之
至再三擊節喜且悲若飲此玄酒揖讓陶唐時我我古

冠裳執彼璋與圭短褐纔掩脛藜藿空忘飢風雅久已
衰作者微君誰嗟我重景仰老大將何為

訪渭口葛秀才因題其壁

山盡江勢急江迴護平林中有隱者居樹木敷清陰推
窻萬里適快我三年心摘蔬薦濁酒拂石題新吟醉來
縱言笑起坐臨淵深魚鳥亦遂性向人自升沈斜陽忽
滿地引杖窮幽尋主人樂未足明朝期抱琴

次韻牟成甫

我屋青山下江淨餘霞赤三年卧憂患迹絕城府入扁舟乘興來獵獵風滿席豈無知心人邂逅談燕集撫物空自嗟白鷗亦閒適虛名勞苦生於事竟何益

雨中

驟熱變風雨氣候一日殊綠樹擁如蓋殘花落無餘閒居日偏永手把種藝書幽幽魚鳥適寂寂車馬疎田父二三輩濁酒時來俱愁陰每思霽微涼意稍舒攜筇獨延佇層雲起遙墟

漢劍歌

為吳間
間作

古劍粲粲一泓水高堂脫鞘神光起何年失勢竟飛來
風雨靈雌泣淵底自從掌握歸山人句連鐵鎖羈烟塵
山石裂開鳴碧玉土華蝕盡浮蒼鱗天官下勅百靈守
呼吸雲雷任驅走或云其來由漢始留侯佩從赤松子
千載相傳有定名造物忘令書太史君不見千將莫邪
離復合氣衝牛斗森滅沒長鯨掉尾滄海闊

贈送蒙古字周教授

周宣石鼓久剥落浮雲變化字迹訛八分小篆亦已廢
紛紛行草何其多洪惟盛世自作古制書勒石傳不磨
知君達時尚所學落筆星斗光森羅蒙恩千里領教職
養育多士培菁莪諧音正譯妙簡絕窮究根本芟繁柯
牙籤玉軸點畫整照耀後世推名科愧予鄙俚事章句
儒冠多誤將如何

將過池陽留別諸叔兄弟諸友人二首

拍手唱歌莫放狂舉觴飲酒莫令醉歌聲出口難為情

酒味入腸化為淚男兒書劍從此始歲晚烟江片帆起
相如題柱過長安靖節辭官歸栗里人生窮達固有時
我輩行藏得其理沙頭執別意如何莫對酒莫聽歌我
折梅花君折柳明日天涯愧奔走世路茫茫重回首

有耳不聽陽關詞有口不飲長沙酒丈夫肯作兒女情
對酒悲歌惜分手天荒地久歲云暮飛霜急霰勢欲走
丘巒奔摧山月墮鯨鯢翻波江水破江水萬里從天來
長風日夜千帆過皇英二女今遼絕太白千年古離別

往者不可追浮生何足悲君不見延平風雷起一夕神劍會合當有時

贈任丹碧鍊師

火雲壓峯斜日明下照百尺清溪橫丹葩碧樹光爛爍
妙筆可作詩無聲買田築室者誰子江海欲歸吾老矣
袖中豈無千世書當年曾說黃冠師

贈張娃

張家女兒八歲餘手把椽筆誇能書翠眉玉貌畫不如

卷二十二
一朝獻藝承明廬風雲會合冠佩集當面濡毫翻墨汁
弱身窈窕纔過郗步腕迴旋萬鈞力怒鯨橫海枯樹立
震空忽墮顛崖石功成直與造化俱歛見聲名起京邑
紫裘蒙茸年少兒寶刀瓊帶羊角觿平生一字不到眼
對此悄然顏色赧君不見蔡文姬班婕妤風流文采絕
代無吁嗟陶家五男子總令紙筆為荒蕪

無題

空房獨卧風夜號孤燈垂燼光影搖舊語已逐香塵消

玉琴瑤珥應自玩巧計却愛蛛絲嬌

高侯畫桑落洲望廬山

楚江浩浩山礧礧澹然粉墨凝冰綃直峯橫嶺藏曲折
筆力巧處疑鑄雕高堂淨如拭坐覺風蕭騷莫雲春樹
隱復見人家半落滄洲遙中有隱者居平生不受東林
招日夜千帆萬柁過未已誰肯拂袖同寂寥我愛高侯
得天趣所見歷歷窮秋毫米家父子稱好手率意尚復
遭譏嘲靈機直恐神鬼設變態叵測魚龍驕玉峽飛孤

泉香爐障層霄自憐失脚行萬里微官羈繫何由逃焚
香沽酒靜相對長日令人愁恨消

袁伯長虞伯生約重賦次其韻

長江西來生遠洲極目凝作人間秋竒峯列筍拔地起
晴嵐積翠凌空浮當時懷抱真快事笑撥短棹隨鳬鷗
乘清弄影歌窈窕洗淨萬斛黃塵愁風濤擊岸石欲裂
日月出海雲還收別來間身墮羈束撫手歎惜年光流
高侯胷中蟠景概落筆肯為仙翁留神工超出八極表

下視海岳如浮漚至人不遣魂作夢咫尺已足窮追搜
我愛題詩招靖節況有二子鳴相酬便當開樽醉其下
髣髴領引為黿頭蒼烟歷歷辨廬屋丹樹熒熒明林丘
安得高侯數相見添寫一葉南歸舟

牽舟行

河水沄沄流不已汴流牽船魚貫尾怒風卷地漲黃塵
白日茫迷霧雲起前船纜影百丈微號呼併力行如飛
後船纜斷勢一失汗身滿足不相及須臾十里迴天風

舉檣撇柁懸高蓬誰知日莫泊處所成功却與前船同
篙師接語告勞苦僕從亦復譏途窮持樽傲坐且引醉
悲喜豈足關吾躬君不見何獨人生行與止請君萬事
推此理

度閘行

新河十里分三閘閘東水奔河勢狹萬里昂昂擁不前
我愁度閘如度峽下閘已開上閘閉牽舟稍前復留滯
兩髯咆哮氣敵虎擊鼓鳴鑼竟何計低迴却坐同歎嗟

咫尺攀躋未能至，憶昔枝江南賦歸。
手招五老風生衣，挂帆一日走千里。
錦鯨跋尾開烟霏，爾來閒身落羈縶。
繫安得化作孤鴻飛，人生百年復何有。
羨殺津頭老漁叟，野祠日暮烏鳥啄。
得魚唯知換村酒，故山花木春事深。
迴首漂零不知久，明朝度閘舟已東。
歸來歸來乎山中，高陽舊徒吾爾從。

除日登大巖山

大巖顚顚昂衆峯，長年秀色摩蒼穹。
中峯獨高勢最雄，

支牽脈貫相附庸朝賓大明滄海東岫雲勃鬱凝青紅
懸崖萬仞寒潭空下有晴雪生喬松形勞膽怯望莫窮
但覺一氣浮洪濛松摧雪凍藏龍峯顛鎮以龍王宮
擁潭出雲如白虹妖魃却走年穰豐南村北崦篁樹叢
喧招巫覡撾鼓鐘苔荒怪石低復崇嵌空欲墮疑神功
直者覆釜橫列壠森布兵戟羅羣童盤迴絕頂路杳通
扳藤舉膝撐心胷嗟予北游覽岱宗太行西來連華崧
浮生萬里隨飛蓬夢寐豈與當時同虎行草偃吹烈風

苦寒側翅號冥鴻
麻姑敬亭知幾重
李謝空復遺塵蹤
悲來狂呼赤鯁公
五湖烟波駕孤篷

贈楊生

生能琢研

余聞江東之山出新安
千峯萬嶺龍屈蟠
黃山崔嵬九華對
雄雌時作風雨會
中藏龍尾氣清
淑山骨稜層石如玉
六丁呵護雲氣漫
不知何年鑿深谷
南唐綠研膚起鱗
手摩潤澤疑新浴
羅紋刷絲名漸殊
谷深水淺真難復
舊石既無新石出
貴介視之輕瓦礫
楊生磨琢獨

非常手持一二來豫章百金酬價猶自惜故家云有千
歲藏或聞山崩泉脈湧翻闕當時遺石動至今散落樵
牧家敲火磨刀隨日用衝烟踏雨忽驚逢席裏氈包不
辭重我嗟拙書好蓄收松烟禿兔非其儔嗚呼人生抱
才坎壈勿輕許時來相遭亦如此

題商侯畫山水圖

秦鞏諸山天下美相君愛山心獨喜商侯落筆圖畫裏
盤迴咫尺藏千里遠山天際抹修眉近山淡黛連雲起

下有百尺清溪水石闌木盾懸崖底時見行人去如螳
危橋吹斷橫沙尾村落林園接遐邇雲中世家重釋流
東剎凌虛構華侈撾鐘擊鼓兩巖間西剎輝煌賀蘭氏
商周遺俗亦在耳宜無當時隱君子我欲追游繭雙趾
却愛孤舟岸旁艤商侯商侯巧能擬安得從之慰我思
呼酒盡歸溪藤紙

濟州

究泗支流魯山麓會濟分河向南北扁舟高枕卧看山

青入齊雲雨新沐六年歸老敬亭間忘却塵埃道路間
松聲入夢山巖裏驚散風帆去千里

題趙虛一山水圖

我愛青山欲歸去偶見生綃喜還住層巒疊嶂遠冥濛
旭日東生光彩注簾陰微閃數枝丹疑是巖前半開樹
晴嵐曉翠千萬重一覽底須攜杖屨郭生十年不相見
筆意從容入天趣青田道人如瘦鶴能跨生駒窮海岳
何如挂此素壁間終日焚香相對閒政爾胸中有丘壑

烏帽黃塵漫飄泊向來山中我醉眠白雲孤飛興悠然
清幽到處畫不出自遣數語人間傳

送郭教授歸鎮江

長江日夜東南來千巖萬壑雲屏開樓船挾纒行若飛
白晝擊鼓轟晴雷屹然中流浮兩峯颶風撞瀾勢欲迴
珠宮貝闕掩靈怪滉漾百尺瓊瑤堆扶桑之西接巨島
日月出沒荒城隈英雄遺跡尚可識人物往往鍾奇才
嵯峨黃鶴起烟霧杜鵑花落蒼莓苔當時我馬曾駐息

浩歌散策為徘徊霜髯古色猶在眼恍若薄夢墮飛埃
六年買屋住京雒鳳毛忽來光璨瓘論交問舊喜復嘆
詩酒解后常開懷如何掉頭不肯住笑張短席懸歸椀
故山早晚我亦往莫遣猿鶴相驚猜

送劉道夫

西罨松篁路雪消沙水清天寒行役倦酒醒別愁生落
日橫車影長雲送雁聲梅花應未發留待照春晴

秋日陪集賢學士趙公敬夫憇龍山玄真宮

山轉疑無地人家近隔村
野田秋穫閑岡路晚行喧
川淨雲生石溪平水到門
偶尋高士隱相見遂忘言

和鄭義山韻

自笑謀身拙相逢客歲寒
江湖猶泛梗日月奈飛丸
凍雪封堦合微燈照影單
鄉愁千萬斛消得酒杯寬

陽墅道中

馬上千峯列溪行不盡源
野船高似屋山縣小如村
路繞田間曲池漫雨後渾
靜來應最樂綠樹擁柴門

燈花

金少卿八言
卷二十二
今夕離家遠燈花儘意開綠烟浮小暈紅焰落輕煤影
照頻占喜心挑莫見猜遙知兒女坐歡笑對銀臺

和戴剡源同史憲使游三天洞二首

洞底天無隔多應禹鑿開海聲通屈曲石汗洗塵埃欲
探巖崖去空令杖履回無端僧占住多少後人來

古寺何年建形低屋亂巢老松擎雨葢修竹拂雲梢石
壓泉聲伏山迴隴勢包追隨記今日照影俯池坳

同朱克齊蔣教授游大梵寺二首

遠客閒無計，微官欲賦歸。
偶尋幽寺去，頗覺俗情非。
澗澤飢鷹戀，高空獨雁飛。
西風如有意，向晚襲人衣。
梅竹野人家，橫塘跨古槎。
日斜鳴遠犢，風急亂棲鴉。
細路妨行轍，高樓促怨笳。
感懷無盡景，流恨到天涯。

再和前韻二首

喬木蒼烟合，清江旅雁歸。
功名遺史在，城郭昔人非。
家遠書猶隔，春陰絮欲飛。
緇塵空滿眼，終日在征衣。

清溪盤百曲虹影駕橫槎春事怨行客夕陽啼亂鴉山
明分衆木天閣散悲笳却羨僧家勝推窗瞰水涯

居庸關蚤行

茅屋聞雞起羸驂並轡行澗深孤碓響山暗數燈明細
憶昔題處空慚不棄名客愁偏切耳斜月候蟲鳴

槍竿嶺

薄宦辭家遠經秋未得歸直隨山北去却背雁南飛川
淨白雲起郊平紅樹微憶曾留宿處立馬認還非

次韻袁伯長舟中雜書三首

百里長堤上龍蔥夏木清山雲含雨重溟浪挾風輕弱
質辭官責歸心數驛程江湖眼前闊點點白鷗明
憶昔相逢日維舟夕樹邊岸花飛別酒江雁落鳴絃夢
斷三年客雲分萬里天因君共行役撫卷重悽然

漸老慚何益扁舟稍浣塵貼雲鷹翅闊浮日草光勻坐
惻民風歎行甘客計貧遙知故園竹新綠半成筠

宿三閘

小市人家簇扁舟晚色晴山迴傾地勢閘險著溝聲岸
石篙存迹溪風樹引清明朝順流去萬里眼初明

濟州

舊濟知何處新城久作州危橋通去驛高堰裏行舟市
雜荆吳客河分兗泗流人烟多似簇聒耳厭喧啾

清河

溪碧石生處山青雲起時藕花紅映岸藤蔓翠牽籬落
日漁家網微風酒市旗順流船漸急翻覺去心遲

彭城夜泊

今夜彭城月樓頭又許高故鄉千里別浮世百年勞酒
力消殘夢詩裏起舊豪西風稻梁雁江海去嗷嗷

真州

一雨淮南霽新城喜暫登江平流浩浩山遠路層層大
舶連檣發高樓列檻凭北居殊覺久眼畏火雲蒸

郊行

樹末炊烟綠人家住澗西風輕罵語滑泥重燕飛低病

渴憐新釀閒吟憶舊題小莊蠶最熟喜欲報山妻

無題

馳道塵香逐玉珂彤樓花暖弄雲和春風漸綠瀛洲草
細雨微生太液波月榭管弦鳴曙早水亭簾幕受寒多
少年易動傷春感喚取佳人對酒歌

立秋日留陽墅菴

林陰敲枕午雞啼薄夢驚回盡已迷漠漠蒼烟杉一徑
粼粼碧浪稻千畦龍湫騰救年來旱虎跡新行雨後蹄

自表瀧岡何日事傷心淚灑夕陽西

久留翰院思歸

日日思歸未有期夢魂幾度繞園池
白雲滿地山深處紅日當簷雪霽時
竹外板輿春步小花開銀燭夜筵遲
好將烏鵲頻占喜便買歸舟泛碧漪

寄張芳洲

客裏秋風厭道途歸來決策侶樵漁
知心白石烟霞在滿眼青山故舊疎
畏熱還思親枕簟愛閒應媿負琴書

麻姑池上花如錦何日相過駕短車

舟過湖州

樓臺金碧照嵯峨故國諸公奈樂何
遼鶴歸來城郭在海鷗飛處水雲多
春迴廢苑花新發愁滿空船客自過
回首蒹葭三十里天風落日斷漁歌

得家書

睡起相思勞寸心卷簾無語立簷陰
故人千里碧雲合斜日半川紅樹深
江雁忽傳秋後信隴梅應待雪中尋

天涯奔走成何事
輸與寒窗抱膝吟

通州道中

萬雉參差雲霧開
四千里外客重來
平岡日出車牛喘
古道塵飛驛騎回
白玉至今傳楚璞
黃金自古說燕臺
高樓紅旆應如昨
莫遣新愁到酒杯

裏胡則天

疎林日暮雨潏潏
睡起秋聲滿樹間
高閣卷簾人北望
短帆隨雁客南還
棲遲自覺身全懶
憂患潛驚鬢欲班

應有山靈迴俗駕不妨長日掩雲關

餞王敬叔

十年湖海一尊同醉裏那知鬢欲翁
投轄不緣今日雨論文未減昔人風
春隨流水三分盡酒重交情百罰空
莫道雙溪堪舉棹片雲來往敬亭東

寺丞公索賦鶴雛

楚楚玄裳映縞衣長身漸見頂丹微
未乘遼海秋風去應待緱山夜月歸
珠箔小開頻飲啄玉琴閒弄學鳴飛

主人馴養情方狎莫似鷗盟海上機

五月三日出城南書所見

短衣出郭暑風清
袞袞西山晚日明
密樹藏村疑斷徑
小橋分市識荒城
碧波暈隨魚沒白
隱沙痕逐馬生
到眼天機無解處
亂鴉欲息更縱橫

邳州

荒城十載路重經
暫舣扁舟坐驛亭
春到梅花何處白
雪晴山色向人青
驚心家遠書難寄
迎面風寒酒易醒

莫憶牽衣兒女態
曉猿夜鶴笑林扃

采石磯

斷磯江上碧
嶙峋漠漠蘆花轉
岸頭舟小風微
猶勝馬山高石立
宛如人羨渠釣艇
滄波闊老我征途
白髮新寂寞蛾眉
在天際遠烟青處
晚雙顰

惠安橋

潯陽山水壯南州
千尺飛梁連去郵
蛟鱷翻濤聲吼夜
虹霓分雨氣橫秋
險疑雲棧通車馬
高比銀河挾女牛

鉅萬功成書太史絕勝舟楫濟中流

送馬伯庸學士赴上都

人間六月沸炎波上國清涼樂事多
視草舊傳真學士散花新起病維摩
千年結友心相似萬里辭家意若何
料想勝游偏得句秋風先寄雁南過

過河西務

兩年衣袂撲京塵出郭青山照眼新
食祿無功酬聖主棄官歸隱奉慈親
交游此別三千里衰病今逾五十春

自笑虛名成底事閉門何恨著書貧

送師道姪赴太常奉禮并寄勉師泰二首

江浦風帆拂翠微官程日日去如飛容臺晝靜花明珮
玉禁春深柳染衣隨直定知車北上思親莫忘雁南歸
青雲故友應相問為說烟蓑老釣磯

四月含桃喜薦新紫衣贊禮屬芳辰官稱猶是青氈物
老大潛驚白髮人客久蘼鹽憐汝弟病多藥石愧吾身
小窻風雨連牀夜記取挑燈莫厭頻

司業李公哀輓

山立庭紳聳衆觀名高真不愧儒冠
文章清廟藏琛玉勛業烏臺振羽翰
譽重朝端知有子貧憐身後似無官
百年耆舊凋零盡展卷哀辭忍淚看

賦牡丹

得千字

曲檻春如錦晴開曉日妍樹搖風影亂枝滴露光圓玉
佩停湘女金盤拱漢仙翠填宮鬢巧黃染御袍鮮力費
青工造名隨綺語傳細翎層擁鶴弱翅獨迎蟬倚竹成

雙立留華任衆先，久看心已倦。
欲折意還憐，洛譜今存幾。
吳園路憶千，可應頻載酒。
相與醉華年。

次王士容經歷賦廣東二十韻

巨鎮雄江表，炎州介嶺巔。
通津波險涉，接驛路高緣。
土貢來遐遠，輿圖按末顛。
獷民疲鬪蟻，狡吏攫飢鷗。
蠱念山多瘴，蒙知地出泉。
黃浮烏影淡，紅暈蜃光連。
石老苔成蘚，崖陰筍作鞭。
翠屏開近嶂，素練杳迴川。
禽弄千般巧，花分四序妍。
九重嚴政治，六轡選時賢。
喜際風雲會。

同沾雨露天勝談蓮幕內妙句藥階前苦味檳榔好清
香荔子縣罕逢苑北馬富聚海南船古跡荒城碣晴炊
野墅烟行經韓子竈蠻恥越王偏賈客財常萬僧尼寺
或千整締冬亦爾乘屨俗依然人物生唐相儒風盛孔
編快心時小憩過眼境頻遷發興超言外銷愁向酒邊
入朝應報最何得賦歸田

題虞少監小像

巖壑高堂上烟霞眼底清向來曾寄迹老去未忘情茅

卷二十二
屋蒼林掩藤崖白道縈遠峯雲際直孤嶂水邊橫宿雨
分濃澹斜陽閃晦明折梅驚雪墜倚竹待風生嶺斷炊
烟補沙迴甃岸傾雜花浮野意飛瀑送溪聲婦饁忻鳩
喚兒耕感憤鳴攬衣隨處坐曳杖有時行拄笏曾招爽
投簪每懼盈他年著書樂應不愧虞卿

舟宿荻港

冉冉秋雲暮衝寒買去船長江瀉吳楚故國澹風烟日
黯蘆翻雪磯危浪拍天蛟鼉潛暗壑雁鷺起平川虎飲

沙遺迹龍歸窟獲涎岸崩縣老樹山暗失層顛靈廟森
長戟奔灘抱古廛漁家罾網集商舶鼓鉦闌登覽誰無
恐漂零客有篇浮生行役苦即合卧林泉

槍竿嶺

百折迴岡勢欲迷舉頭山市與雲齊經行絕似江南路
落日青林杜宇啼

李陵臺次韻楊學士

青山繞驛客重來十里羸驂首重迴今古李陵悲絕處

夕陽野牧下荒臺

上藍寺

在洪城內乃
馬祖道場

古寺迴廊雪滿階
官閒因訪老僧來
一方晴日簷聲響
絕愛小窻臨竹開

舟中偶成

稻花水落正魚肥
湖上孤雲帶雨歸
林影倒涵波鏡動
白鷗低傍釣船飛

過廣德

黃塵鞍馬夕陽邊不到桐川十二年萬事只多新白髮
虛名何日賦歸田

偶成

湫湫橫塘柳四圍雨餘來看綠陰肥燕翎拂處波如縠
半幅深紅漾落暉

池州郡齋除夜寄呈家君

郡齋寥落夜無眠紙帳青燈思悄然不是今生惜今夕
却緣明日是明年

望池州山

少年江上一官閒
老去重來似夢間
欲覓故人行樂處
白雲遮盡九華山

慈湖磯

碧蘿交蔓絡崖陰
潭底潛蛟萬仞深
今古江流推不去
溼雲長護最高岑

題扇

花禁春遊玉輦遲
君恩同載妾深辭
娉婷團扇秋風底

猶似增成寵幸時

寄報國寺訢笑隱

江海無端客路長
扁舟明日棹滄浪
遙知風雨溪窻夜
夢逐潮聲到上方

元詩選初集卷二十二

欽定四庫全書

元詩選初集卷二十三

庶吉士顧嗣立編

張中丞養浩

養浩字希孟濟南人自幼以才行名薦為東平
學正遊京師獻書于平章布呼密大奇之累辟
御史臺丞相掾選授堂邑縣尹擢監察御史疏
時政萬餘言為當國者所忌除翰林待制尋罷
之恐禍及乃變姓名遁去尚書省罷召為右司

都事遷翰林直學士改祕書少監延祐設科以
禮部侍郎知貢舉累拜禮部尚書英宗即位命
參議中書省事以父老棄官歸召為吏部尚書
不拜泰定間屢召不起天歷二年關中旱飢民
相食特拜陝西行臺中丞慨然就道禱華山嶽
祠泣拜不能起天忽陰翳一雨二日到官四月
傾囊橐以賑飢民日不勝給每撫膺痛哭遂得
疾不起贈行中書省平章政事追封濱國公諡

文忠別號雲莊有雲莊類藁行世江浙行省參
政富珠哩朮為之序曰本朝牧菴姚文公以古
文雄天下天下英才振奮而宗之卓然有成如
雲莊張公其魁傑也又曰其文淵奧昭朗豪宕
妥帖辭必已出凜有生氣今觀其句法如江空
孤月白天闊片雲高月色蟲邊苦秋容雁外深
斷嶺雲通氣顛崖樹倒根又鶴嫌客俗穿雲去
燕喜春陰掠地飛華髮半簪天與老丹楓兩岸

水分秋半窻春夢子規月滿院客愁楊柳花勘
破宦途盤谷序蹴開天網漆園書其風致瀟灑
亦在元和長慶間也

維日之良 祀祖宗于家廟也

維日之良嘉薦令芳于豆于俎是登是將于祖考之堂
燭輝其前鐘韻其傍神具億止風帷褰揚儼承其容
光儼覲其冠裳儼聆其謦欬儼被其文章 維靈歆止
我侑我侍胥悅胥怡載鼓載吹工祝有嚴儀物孔備將

何以祈躬躬惟畏 匪位秩欲隆匪貨利欲充匪居第
欲侈匪禎瑞欲豐 子祈其賢婦祈其從兄祈其友弟
祈其恭德祈其厚業祈其崇族祈其睦時祈其雍維神
人攸同

有田 野人遂其間也弱冠出仕知命而歸爰處
于郊有琴書以自樂也

有田負郭伊邇匪遼我倦而歸於焉逍遙爰力于書且
勤于苗朝斯夕斯以詠以謠式結今好言報夙勞 山

既我狎川亦余媚維禽維魚亦莫余畏
林則有風洞則有雲釀則有秫饌則有芹樵則有柯釣則有綸
維人至樂曰丘曰壑得而顓之何有人爵
彼爵與名豈不我榮具或舍旃允有未任允有未任且以鼓琴

壽子 示引也

於維我祖肇基青陽揮為弓正爰氏以張厥族孔殷奕
葉振芳周仲孝顯漢良智彰釋之平決博望遠揚折轅
有湛埋輪有綱吳憚昭直蜀賢飛剛五龍佐宋九齡輔

唐睢陽之節山斗與昂燕公之文江漢巨量玄素遺直
志和真藏下迨五季全義循良天水之興齊賢慨慷乖
崖崛起西土是康橫渠道學于聖有光南軒繼之益熾
益昌天開皇元有公有卿凡吾之胄皆時之望 繫我
王父更世多故服戎前茅艱險伊屢其周人急空囊弗
顧垂百其齡可灼平素父年十八獨任家務于江于淮
是亂是遯以隱于賈以晦其著以儉其出以阜其聚以
開我人以篤我祜余時昉冠儒雅是慕維詩維書靡旦

靡莫其業未竟迺仕迺驚親實命之弗荷恒懼幸無失
墜以永終譽豈曰能官菽水攸助甫出五旬遂引而去
二子喪一今惟汝獨汝兄使存吾豈汝督茲因誕辰
畧汝之告彼聖與賢非四耳目第性湛然不汨於欲夫
道非遠在志之篤維志之篤無堅不窟無遠不躅無高
不升無深不矚其弱可強其暗可煜鐵焉可金石焉可
玉母小成是桔母細娛是逐母師友是拂母祖宗是辱
維人之心匪惡伊善由弗修養道乃違叛處彼下流

只將孰怨粵天地分歲月無算此身始有胡忍塗炭古
人遺訓方冊具見吾指其南汝進母憚

得子強也書詩以答之

有客附書至封識墨尚新展讀笑良久勸我歸及辰我
宣不汝懷愛此泉石鄰官事亦既簡又多素心人劉生
書滿家揚叟酒味醇而況俱好客有假眉不顰緬思霄
壤間實與逆旅均焉往非寄寓奚必家園親置書桃笙
底且復樂我真

夜雨寄呂叔泰

隆隆暑威歇稍稍秋意深豐草漸改色穹林亦蕭森
沉茲風雨夕微燈翳寒陰潛蛩洩幽語徂鴈遺哀音
以我耿耿懷知子難為心含情睇層昊咫尺猶商參
裹飯孰子遺載酒孰子斟豈不欲一往畏彼泥潦侵
古人道義交非惟讓分金斯事久索莫念之恨彌襟
願言軌前躅尚期勗來今

擬四季歸田樂

春

日月底天廟陽瘴土脈生習習協風來
顥顥衆蟄驚農人服厥畝薄言事春耕
缺堤流瀼瀼灌木鳴嚶嚶白扉颭青
帘綠野明丹英蠶婦喜形色牧豎歌傳
聲天隨野色遙山與吟懷清向來慳一
際今者幸四并徜徉子真谷萬事秋毫
輕

夏

北陸展修晷薰風薦微涼麥波浩無津
細路如橋梁溪

光林樾潤雨氣桑麻香春聲破幽寂人影來微茫缺垣
誰所居紅碧相低昂翁媪老瓦盆兒女前捧觴我行適
見之亦覺心樂康昔聞太古俗今歷華胥鄉向令早知
此詎使田園荒迷途諒非遠淑景良未央於焉遂平昔
孤陋庸何傷

秋

黃雲亘郊野農力今有功茲乃民之天治理根其中我
雖未及粒已覺飢腸充田頭父老過擊壤今歲豐自愧

無寸積坐享雍熙風秋成既如彼況對菊與楓氣澄天
宇高心寂塵累空木落山獻體波縮沙留蹤遐興何悠
悠迅景何怱怱俯仰田舍底或能保初終

冬

歲晏日南至場圃靡所勞告成三務功盈耳康衢謠鴉
飛嶺外陂虹斷林邊橋將期養疎拙詎厭居寂寥負暄
坐晴簷煦煦春滿袍對山閱吾書懷古酌彼醪此樂天
所靳何幸及草茅雖非鹿門龐或庶彭澤陶為詩寫幽

尚刊落華與豪集以貽知音悵望心搖搖

登司天臺同李景山元復初分韻得色字

湫居厭紛龐升高百憂失河流耿微明野燒還故碧太行望中低斷處仍雪色翠華天尺五金城年萬億美哉山河固兩有險與德區區遼與金銅駝幾荆棘開闔看烟雲興廢感今昔所恨難久留悲風晚來急

趵突泉

物平莫如水墮阻乃有聲云胡在坦夷起立若分爭無

乃滄溟穴漏洩元氣精不然定鬼物搏激風濤驚竒觀
天下無每過煩襟清茫茫彼區域載物良不輕微水坤
焉浮非天水奚生孰知一脈許而與天地并因之有真
悟日晏忘濯纓

郊行

遠山如遁藏近山如見逼老夫緩策行超遙歷阡陌清
風動林木浮嵐上巾幘雲霧自遠來忽覺川陸黑霏微
數點雨顧視衣不溼野色含蒼茫如游化人國平生喜

清景攬之欲杯吸詎惟可樂飢亦足已沈疾幽閒自能
年直恐人未識千載桃源春莫謂訪無跡

郊居許敬臣廉使見過

野處欲忘世況乃平昔友寥寥數畝園甘此養衰朽茲
晨君見過童穉駭而走牙燾明郊原騎從隘巖數輝光
生泉石意氣排戶牖握手論夙心相看各白首疊疊及
經術眷眷接杯酒嘉我高尚懷一卧七年久自言微親
老亦欲謝紛糾從仕非不佳其奈多掣肘所以明哲人

徃徃去之陡此言公近諛彼節余何有本期野老俱孰
敢達者偶渺渺烟林合浩浩風隧吼涓涓水穿竹忽忽
日低柳出門俱黯然人影亂田畝

長安孝子賈海詩

天歷元二載西土罹薦饑愚時拜中丞帝曰汝徃釐嗽
嗽三輔間十室九困疲行者總溝瘠居者恒餒而親戚
自魚肉遑恤父子離鄩縣民有賈竭力奉母慈闔門為
口四一妻仍一兒操瓢日行丐有得歸母貽不幸值虛

往見母顏怵怵退省百無有滿屋風淒其以湯和糠粃
進母母不怡曰我幼汝飼非珍即甘飴而汝令我哺以
我犬豕為况我老且病累汝無幾時子懼白其妻無言
第頭垂妻曰攜此子從鬻無問誰市呼不見售復歸泣
漣沛子心救火急兒命累卵危陰攜至他所恩愛從此
辭解衣縊不殊反為子禁持取盆拔佩刀手足隨紛披
紿云黃犬炙雅於補衰宜母知口腹美不悟骨肉虧子
幸母解顏不計妻攢眉余聞驚此言怒詰官失治使民

至如此賑貸猶遲疑即引造行省使細陳毫釐且命出
兒肉闔府徧示之飭諸相坐前余為失聲悲促掾狀其
故聞上星夜馳或將復徭役或將表門楣或斥兼金賜
或選好爵縻上以勸臣子下以安期頤廷議必不爽命
下曾有時昔人有埋子天憐以金遺復有貸視者哀鳴
走通達亦有棄半途完姪與相隨未聞刃所愛萬古猶
絕竒嗟哉賈生心世俗彼烏知母以賈為及母以賈為
痴子失或再有母失庸可追孰能庭桂惜使我堂萱姜

惟其持是心屠子如屠狸粵從王政圯風靡俗亦滴子
囊錢貫朽母篋無針錐子妾曳綺羅母裙露膚肌不慮
親猶天以利為根基不究身何求以貨為宗枝於物尚
爾靳矧乃襁褓私嗟哉賈生心堪為世俗規嘗聞前哲
言一孝蓋萬疵孝可包衆善孝可動兩儀孝可神鬼格
孝可賢聖期能孝斯能忠厥心自親移願彼為人子終
身誦吾詞

史稱希孟為行臺中丞聞民間有殺子以奉
母者為之大慟出私錢以濟之即此事也

毛良卿送牡丹

并序

同閑毛良卿家牡丹盛開意余一過而未敢顯
言日者以折枝數花見貺余媿老嫗不能副其
意故作是詩以釋之

三年野處雲水俱逢春未始襟顏舒故人持贈木芍藥
慰我意重明月珠入門神彩射人倒荒邨爭看傾城姝
急呼瓶水浴紅翠明窻淨几相依於自言私第惟此本
每開蹠轂窮朝晡樹高丈許花數十紫雲滿院春扶疎
栽培直訝天上種熏染不類人間株有時風蕩香四出

舉國皆若蘭為裾貧家茹居僅數椽照耀無異華堂居
天葩如此忍輕負轉首夢斷巫山孤明當灑掃遲鳬鳥
未審肯踵荒寒無余聞感德良勤劬久習懶散倦世途
深藏非是德公傲索居莫哂儀曹愚禁厨一鱗味已得
類推固可知其餘君持詩去為花誦蜂蝶應亦相懽娛

遊香山

山行彌日山益奇亂峯挾翠如吾隨遊人聯蟻度林杪
細路一線雲間垂茫然四顧動心魄嵐光蕩秀浮雙眉

路迴寶刹忽風墮大鵬九萬離天池林烟媚景翳復吐
欲見不見神護持松藏雷雨太陰黑泉迸巖藪銀虹馳
我來青帝已迴馭太古殘雪猶離離一聲唳鳩百花落
兩崖紅雨春淋漓笑驅虎豹坐盤礴悠悠萬古歸支頤
須臾興盡下寥廓長風又送雲邊詩蓬萊兜率杳何處
無乃造物移於斯往年夢裏記曾到先聲已為猿鶴知
惜無奇語勒丹壁坐令清賞成絕癡斜陽忽將暝色至
山靈應怪歸鞍遲人間勝事忌多取毋使樂極還生悲

贈劉仲憲

并序

仲憲衛州人以儒掾臺省者十餘年清苦如一日
人饋遺皆不受能詩喜談政治嘗謂為天下不自
農桑始三代之盛終不能致間嘗叩之其言激
切或至淚下余器其人類古君子故以詩贈之
廟堂鼎食窮水陸風紀惠文寒聳玉而君名位不省臺
常見私憂結眉目竭來我過白所懷如枉未伸功未錄
諄諄三代治安本修水火金并土木烝民既粒教乃敷

和氣春風生比屋自從秦鞅廢井田王政絲棼民涇東
利歸兼并富嚙貧萬世禍基從此築漢興文帝殊有為
瓦礫黃金金玉粟蠹農一切悉禁絕千耦如雲四郊綠
下及魏晉隋唐若唐或耀武功或貨黷盡剝民力供上需
何異養身還餌毒間時偶爾值小登悔禍元出天公獨
勸農使者徒上功虛麗祗堪文案牘繹騷後迨五季間
競投錢鑄懸刀鋸民間十室九砦家父子幾何不溝瀆
吾元有國天所資世祖躬歷艱難熟未遑禮樂刑政頒

首闢司農惟禱督至今在在著作林枝幹排雲葉猶沃
當時治效槩可知行不齎糧居露宿茲非前聖後賢規
宣特千年萬年福統元欲復今何難政坐因仍弗加勗
駿奔期會誇獨賢深竟根株銜能獄毀方求媚為通融
滌垢搜癥稱幹局嗚呼是豈經遠圖刑剝誰虞覆公餗
孟氏古稱王佐才照世格言星日烜論治畧無奇異聞
唯說耕桑與雞畜使當此日出此言可必諸公盡輦輿
聖賢於彼非不知但恐違天拂民欲竊嘗窺管得一斑

端本澄源在當軸仍擇師帥專撫綏且諭臬司精考鞠
的行黜陟表情勤重立賞罰旌慝淑如斯上下不裕寧
伏鑕市朝甘顯戮我聞其語汗雨如始也解頤終項縮
半生醉夢鄭衛音一旦醒心韶濩曲劉君劉君策固佳
俯仰悠悠知者孰傳存拾潘示永箴書著興戎昭往躅
君不見東家求官交近侍西家豪富相徵逐奈何溫飽
不自謀日為黎黔欲長哭我知君心如古人我知君才
非世俗子牟身遠志在廷梁父調高音振谷賈生流涕

叫虎關屈叟甘心葬魚腹舊聞造化輔善良比歲看來
亦翻覆紛紛已往姑莫論目擊試將吾友卜承家千里
止一男半夜麒麟去何速淚巾又燥女又殤蘭玉埋香
見無復士夫固以貧為常門戶那堪禍相屬我嘗送米
猶見却一芥他人肯輕觸處勤節義愈凜然風雪倒山
松柏蟲邇來蹤跡尤可嗟十倍戒途輿脫輻勞勞簿領
頭斑白承務酬官在昏夙否極或者泰運還有詔吏止
七品服君由弱冠冠儒冠一槩誰分鸞與鵬世間屯難

表裏攻阮籍途窮未為促昨朝跋馬過所居圭華荒涼
雀堪撲座無裊褥甌生塵皮有詩書盤苜蓿歸來歎羨
原憲貧却顧輕肥還自慙寒余亦本山野民仕路強趨
終蹣跚向非親命須官為定買烟霞事耕斲書生所見
然頗同欲奮不能寧韞櫝因知世事如意少詎止君家
為不足子孫筍列多冥頑玉帛山堆足憂辱國忠貴顯
奴隸憎黃憲清貧古今伏人生果在官有無可與智言
難衆告今晨霽色雨洗新羣木疎明麗朝旭一杯陶寫

千古情我起踏筵君擊筑天開羅幌雲千疊地展錦屏
山四簇不須華俎飮薨魚政要露杯羞杞菊須臾醕酲
彼此忘哀玉滿庭風動竹

過長春宮

往年嘗夢蓬萊宮三山黿背搖虛空滄溟俯視一衣帶
銀河鼓浪來天風茲遊良不異疇昔半日惝恍迷西東
平生頗似有仙分足跡未到神先通層樓複觀此誰構
只疑天巧非人工繞簷松影黑於海步驚棲鶴翔雲中

西山亦喜得佳客巍峩相向如爭功
遼金興廢渺何許
令人一笑憐雞蟲須臾遍歷至方大
壺酒盤果羅青紅
心清已覺破煩暑左右況復扇兩童
道人見我樂幽勝
故為留戀談無窮鼎鑪百沸失膏火
風水萬里忘萍蓬
默求詩句為相答半醉揮出毫端虹
烟雲滿室動鬼神
不但為彼開盲聾笑談人境兩相稱
此會詎與尋常同
却愁歸去到塵世又隨俗迹墮樊籠

西巖醉筆

興來放步白雲嶺海闊天高異入境亂山萬馬東南馳
只恐郊原碎俄頃乾坤誰管白鳥閒今古空餘野烟冷
何當結屋最上頭擺脫塵紛事幽屏

我愛雲莊好四首

我愛雲莊好溪流轉玉虹驚颺荷背白殘照鳥身紅遠
意微茫外真懽放浪中終身能若此甘作灌園翁
我愛雲莊好柴門俗客稀行田蟲撲帽坐樹蟻緣衣雲
水一銅鏡霜林萬錦機東岡陂故在辭聘未全非

我愛雲莊好衡門晝寂然苔香花覆砌石潤竹通泉獨處蓬為室閒遊杖挂錢白頭鄉社裏未覺媿前賢

我愛雲莊好民風太古淳婦勤絲滿簾兒嬾硯凝塵秦系唐高士張融齊逸人只因疎散久每每忘冠巾

惜鶴十首

并序

蘇四

鶴仙禽也由几翼非其比恒不為世人所愛而愛之者往往皆山林中人蓋物以氣合理勢然也予嘗得其尤者一豢之既久翩跹與人相習日者為田姬傷

其脛九病兩月斃惜哉因取其始末作十詩將以慰

其不幸云耳

尚有友鶴醫鶴招鶴瘞鶴夢鶴圖
鶴六題孫存吾風雅本中全載

購鶴

野處幽獨甚千金得令威挾雲出塵網領月到柴扉
摩足妨颺去遮亭使學飛至今湖上路樹石亦光輝

病鶴

渠本仙家物胡為久不安
強行時搦翼
竚立欲遺丹
誰藥相如渴
獨憐范叔寒
一鳴雖確確
猶自徹雲端

挽鶴

共處人烟外誰期禍乃身
九皋空有恨四野欲無春
華表雲應淚瑤臺月亦塵
當年林處士泉下定相親

憶鶴

玉立昂藏態山中我與君
幾年游賞共一夕死生分
徐步閒窺沼高飛遠帶雲
為誰重起舞倚杖立斜曛

山行

一嬾將成性春游尚爾勤
花敲知雨力水皺見風文
碧

落一明月青山半白雲却愁從此去塵冗又紛紛

晚霽

老嬾便幽靜空庭步翠行牽牛上籬落鬪雀下簷楹斜
照慳窻影停雲足野情田園無限樂夫豈為逃名

晨起

戀枕嫌多夢開簾曙色迷鶴寒依戶立猿餒近厨噓蹴
石泉鳴屋吞烟樹隱堤邨居真可喜觸處是詩題

冬夜早起

推枕人初起出門星尚存歲寒郊野闊天早樹林昏
影猶殘月雞聲已遠邨孜孜何所事時取故書溫

登泰山

風雲一舉到天關快意平生有此觀萬古齊州烟九點
五更滄海日三竿向來井處方知隘今後巢居亦覺寬
笑拍洪崖詠新作滿空笙鶴下高寒

遊香山

常恐塵紛汨寸心好山時復一登臨長風將月出滄海

老柏與雲藏太陰寶刹千間窮土木殘碑一片失遼金
丹崖不用題名姓俯仰人間又古今

同元復初飲許仲文別墅

曉日樓臺海市仙春風歌吹酒家天五雲分彩來瓊島
兩鶴聯飛下玉田流水故將塵隔斷好花都被雨開全
人生佳處無何國鍾鼎山林恐未然

過顏魯公廟

李唐失紀相非夫竟遣忠良與禍俱抗虜一身皆是膽

留名千古不因書極知老境桑榆近爭忍清朝社稷孤
下馬荒祠訪遺蹟北風吹樹渺愁余

上都察院

柏臺人散坐堆厖默記灤江四往迴髮為鴈冠容易雪
心因蝸角等閒灰慚無元素迴天策空負坡仙酌月杯
兩處飄零家萬里亂山遮斷白雲堆

秋日梨花

雪香吹盡樹頭春誰遣西風為返魂月影已非前日夢

雨容獨帶舊時痕只知秋色千林老爭信陽和一脈存
莫訝殷韓太多事仙家元不計寒暄

九日

一行作吏廢懽遊九日登臨擬盡酬詩有少陵難著語
菊無元亮不成秋雲山自笑頭將鶴人海誰知我亦鷗
幸遇佳人莫辭醉浮雲今古劇悠悠

大雨

不用風雪雷
震江海等字

六合乾坤一太陰仰觀毛髮為蕭森排空疑有鬼爭戰

對面不聞人語音元氣只愁今日竭桑田更比向來深
須臾林杪標新霽一抹斜陽溼欲沈

寒食遊廉園

湖天過雨澹春容輦路迢迢失輦紅花柳巧為鶯燕地
管絃遙遞綺羅風羣仙出沒空明裏千古銷沈感慨中
免俗未能君莫笑賞心吾亦與人同

留別元復初

臺閣聯飛二十年臨岐欲別重悽然人言廉蘭才相軋

誰信陳雷志愈堅古井不妨風浩蕩浮雲何損月嬋娟
江湖秋淨多來雁莫惜平安到瘴烟

中都道中

細草和烟展翠茵雜花勻簇道傍春鳴禽曠野棲無樹
破屋荒山住有人露溼敝袍寒襯月風餐行鉢暗凝塵
去年閩海今沙漠贏得霜華鏡裏新

客中除夕

野性巍巍不耐官強顏塵土步邯鄲移文久為雲山笑

捧檄聊供菽水懽香返梅魂春一脈愁叢燈影夜千端
古人事業余何有羞見茅齋歲又闌

直省

微風吹雨溼層陰寂寂長廊靜足音怒虎九關天日遠
冥鴻一線海雲深求田素有陳登志作吏初非叔夜心
說與飢鳶休嚇我掉頭巢父正長吟

留別鄉里諸友

粉署銜香十許年故鄉重到重留連子牟戀闕心空赤

江總還家鬢尚玄金縷歌殘華鵲月蘭舟搖碎灤湖烟
一襟離恨東州路莫訝羸驂不肯前

興和道中

底事勞勞形與神道途鞍馬動經旬烟橫絕澗疑無地
風響深林似有人早發舉鞭揮霧露夜行翹首認星辰
何時却逐桑榆晚愛殺坡仙此語真

建寧道中

行盡溪山得市廛橋樓深入路絲延商帆腥帶諸蕃雨

天宇昏連百粵烟
言語不通剛作字
道途良苦且停鞭
老兵來報肩輿穩
使我愀然愧昔賢

不敢以人代
畜半山事

泉州

萬里飄零兩鬢華
瘴烟為屋海為家
山無高下皆行水
樹不秋冬盡放花
得句珠還合浦月
亂懷杯吸赤城霞
蓬萊咫尺無由到
慙愧當年犯斗槎

寄李道復平章

文武才全每許君
逢時談笑建奇勲
世稱李道為賢相

帝重嚴陵是故人滄海兩扶新日月青天一掃舊烟雲
盛名自古多難處好及明時乞此身

黃州道中

濯足常思萬里流幾年塵迹意悠悠閒雲一片不成雨
黃葉滿城都是秋落日斷鴻天外路西風長笛水邊樓
夢迴已悟人間世猶向邯鄲話舊游

飲城東劉氏園亭

昨日餘醒尚未醒玉溪絲竹又尋盟爛遊償我從前債

沈醉由他已後名雨點殘紅花意動風敲疎翠竹陰清
閒來吟嘯無虛日未覺歸田負此生

哭張澹菴平章

平生許國膽困輪諤諤危言不顧身人道龍逢非俊物
我知汲黯是忠臣轅駒仗馬寧無魄縛虎擒蛟似有神
故劍年來漸零落訃聞不覺淚沾巾

翠陰亭獨坐寄莫俊德經歷

抗俗支塵力不任故園歸卧遂初心近山障霧還疑遠

淺水涵天却訝深有幸鷗盟君與我無情鶴髮古猶今
年來酷愛香山老都把悠悠付醉吟

寄省參議王繼學諸友自和四首

曩昔塵奔為悅親而今雲卧復天真山林充隱當容我
館閣求賢豈乏人噩夢久隨風散曙衰容難與物爭春
綽然烟景無窮在莫怪沙鷗不易馴

身與功名果孰親萬鍾何似一瓢真若教宇宙無難事
未必山林有退人遺語五千方外教行窩十二浴中春

老懷久矣忘機巧猿鶴欣欣燕雀馴

木密垂枝手可親
娜隅羅勒味尤真
詩情滄海騎鯨客

世故青樓擲鼠人

列子

庭樹有陰僧結夏
野花無語女懷

春清風一榻茅簷底
六賊三尸犬許馴

陬隅見郝隆與桓溫詩語

鹿豕同遊木石親
家山歸卧偽邪真
情知五袞縣輿客
肯作千金鬻帚人
往事回頭皆噩夢
故園投足總陽春
麒麟掣斷黃金鎖
為問羣仙孰可馴

山中拜除自和二首

窻下孔賓歸去來春隨三十六宮開虛言徒使燕人淚
列子實用休爭楚國才左氏世外此心無芥蒂海中何物是
蓬萊漫郎耳順宜知止誰敢重塵視草臺

文季休歌子夜來淵明自拆瓮醅開舉觴月與春挑戰
得句人驚天假才尚友誰能追北海尋真吾欲候東萊
見漢武求仙事何時晤對安心竟拂落菱花不用臺

雲莊遣興自和二首

中年才遇即歸閒好在河汾屋數間病裏檢書多為藥

老來忘世不因山翠翻平野
禾抽穎錦委深林筍脫斑
莫恨韶光太相促若非衰莫詎能還

人云五十未宜閒我道彭錢亦夢間
五斗折腰慚作縣
一生開口愛談山
荒邨未莫門先掩
老樹才秋葉已斑
只恐溪翁厭喧聒
隔林遙喚野猿還

綽然亭落成自和二首

地僻門無長者車
身閒不遺子公書
羣山侑坐人堪醉
萬事忘懷世自疎
碧玉艷池新雨後
綠雲滄徑落花餘

憑誰喚起濂溪老聽說窻前草不除

僮挾琴尊子御車丹崖到處總堪書白雲有去尋華表
黃閣無心戀綺疎鼓舌為名憐季子舍身逐利笑陳餘
自從投綬歸來後荆棘胸中有翦除

田居自和二首

萍蓬一世百無功轉首俄成六十翁往事鏤舟求墜劍
虛名影筭悟懸弓展開明月清溪閣吹斷香風錦樹空
託意蓴鱸歸故里始知張翰是英雄

稼穡無非雨露功農家分喜到詩翁
勞心漫刻七年楮
貽戚空成九載弓
山展野屏隨地遠
風揮天帚掃雲空
綽然到處皆佳景
安得毫端句不雄

七年刻楮見列子
九載修弓見淮南

子

讀史有感和二首

不信忠良信詭隨
於茲可灼亂亡機
東京黨錮迷臧否
西晉玄談混是非
被禍枉投冠在地
復仇空拔劍揮衣
因知高蹈丘園者
不是區區愛翠微

政有經綸孰汝隨疎迂況復動違機久知好瑟吹竽拙
每笑還珠買櫝非幕府高談人側目田園長往子牽衣
分明二者安危在不信君其問子微

唐赤城居士
司馬承禎也

和魯子翬學士見寄詩韻二首

佳句人傳自雪堂萬人如海一身藏
騎鯨有志尋仙李刺虎無心效卞莊
高枕拂雲眠薤谷直鉤和月釣林塘
寄聲沙鳥休飛去老子年來物我忘

青春回首去堂堂衰白侵尋底處藏
老我痴蠅鑽故紙

何人肥馬耀康莊
翠光挾日山排闥
練影翻秋水滿塘
自笑此心猶有著
幾時喧寂兩俱忘

書半仙亭壁自和二首

丘園投老謝麾招
相與無非莫逆交
破屋帶花紅掩陋
矮牆圍柳翠添高
日明窻戶蠅蛸網
風動蘭苕翡翠巢
入境清幽塵事少
詩成元不費甄陶

可人密邇若難招
俗士紛然每易交
流水樹圍三面闊
遠山雲放一頭高
坐呼赤脚澆新圃
卧看烏衣葺舊巢

哀白太平當自賀試聽工部詠陳陶

翠陰亭落成自和三首

一退愁城萬里降從今按堵樂吾邦
睡殘蕙月猿推枕吟斷松風鶴啄窻
槁木不春從換歲虛舟無物任飄江
撫尊笑向兒童道安得佳肴錦鯉雙

無奈詩魔未易降頓丘堅壁鵲華邦
古今不卷江山畫日月長開宇宙寬
我愛園公并角里誰誇陸海與潘江
寄聲農父須勤力已辦良田四十雙

錦里歸來萬慮降，戴逵何必適他邦。

晉戴逵為避徵
君遠依王珣 幼

思弓劍驅千騎，老愛琴書占一窻。
分茅帶煙寒斲玉，尋梅和月夜臨江。
漫郎雖是扁舟客，政恐漁樵不敢雙。

遂閒堂獨坐自和三首

擊鮮醺酒有餘甘，種竹移花不是貪。
世事灰殘心上火，

年光絲盡鬢邊藍。地環赤縣神州九，

中國外又加赤縣
神州者九見史記

人共山猿野鶴三。六載丘園凡六召，小臣何德聖恩堪。
世味寧同酒味甘，野情不似宦情貪。乘舟遠遁誰如范，

拍板高歌每羨藍追狗僅能功第二卧龍竟使國分三
英雄事業無涯苦舉似高人一笑堪

至味何嘗有苦甘大觀初不校廉貪苔垣蝸篆斜行玉
柳岸鴛梭巧織藍飲興平吞雲夢九吟魂高繞華峯三
青編黃髮林泉下此樂惟應我輩堪

張文忠自和凡十題每題皆十首今擇其警練者錄
之其外有秀句可摘者如斷岸樹連衣帶水好山天
展盡國春無事舉杯澆遠古對花和露折香春亂撥
浮萍嫩葢水稀栽垂柳恐遮山淡無情緒煙中柳暴
有精神雨後山園花撥亂嫩春冗憲竹艾繁愛月疎
持殘斜照春聲急搖碎浮雲水影空溪流隔斷塵千

大雲氣遮殘樹半空任使貨盈元載屋莫教塵化土
衡衣林果簇金低薜徑山泉分玉注蓮塘謀身安用
營三窟容膝惟堪占一巢地寬飛鳥如爭遠天闊行
雲欲闕高日展樹陰濃壓地雲縈嵐氣濕穿窻鴉林
影闌斜陽屋發葉聲乾莫雨窻導
中竹葉能忘世枕上楊花不渡江

秋日村居

衰年卜宅喜山村俗事經年不到門疎雨與秋添索莫
遠煙因晦學黃昏倚松野叟清於鶴偷果奚童捷似猿
莫笑吾廬太孤癖塵囂終勝市朝喧

郊飲醉歸

昨朝醉田間欲借山為枕青山不肯前却枕白雲寢

堂邑宣化堂退食

縣齋公退炷鑪熏聊為塵煩一解紛開戶不教香遠去
簾紋浮動半窻雲

行水災郊外

雲駁疎陰漏日華
矐矐晨色散林鴉
馬前怪底猶明月
路轉滿川蕎麥花

綽然亭口號

十年堅卧玉溪東多謝山靈肯我容
為問賞心誰是伴
抱雲挂月兩奇峯

過李溉之天心亭

放眼乾坤獨倚闌古今如夢水雲間
南山也解留連客
直送嵐光到坐間

咏史

錄四

蘇武

為臣惟命敢辭難脫遇艱難亦自安
試看子卿持節處

雪花如席不知寒

龔勝

解印歸來老分甘素衣不受一塵沾忽驚有詔從天下
頓覺衰癯十倍添

朱震

陳蕃友也蕃誅為區其
子事覺考掠終不肯言

交道衰微數百年死亡誰肯與周全如何當日陳蕃榻
止為南州孺子懸

龐德公

鹿門佳處恣遊遨誰識沈冥一世豪
莫把功名論出處卧龍終讓德公高

贈李祕監

至治間曾
畫御容

封章曾拜殿庭間凜凜丰儀肅九闕
回首橋山淚成血逢君不忍問龍顏

哀流民操

哀哉流民為鬼非鬼為人非人哀哉
流民男子無溫袍婦女無完裙哀哉
流民剥樹食其皮掘草食其根哀哉

流民書行絕煙火夜宿依星辰哀哉流民父不子厥子
子不親厥親哀哉流民言辭不忍聽號哭不忍聞哀哉
流民朝不敢保夕莫不敢保晨哀哉流民死者已滿路
生者與鬼鄰哀哉流民一女易斗粟一兒錢數文哀哉
流民甚至不得將割愛委路塵哀哉流民何時天雨粟
使女俱生存哀哉流民

上都道中

窮涸惟沙漠昔聞今信然行人鬢有雪野店竈無煙白

草牛羊地黃雲鵬鶚天故鄉何處是愁絕晚風前

久雨初霽書所寓壁

癡雨歇簷滴頑雲開日華穴垣驚暗筍捨地惜幽花市
隱靜於野客居間似家故園亦皆寓心定自無譁

休日郊外

久厭官居苦幽尋到澗阿鶴知松歲月鷗狎海風波野
迴塔孤立嶺高雲半過菟裘良未暇聊此慰蹉跎

廉園會飲

倥偬常終歲從容偶此閒
霧松遮老醜雪石護蒼頑
池小能容月牆低不礙山
殷勤問沙鳥肯與廁其間

晨興用俞立之韻

寒碧洲痕淺深青地勢平
品姿呈雅淡樹影碎空明
窻納一天曉人懷千古榮
移牀高處坐遙看日東生

曹中丞伯啟

伯啟字士開濟寧碭山人
至元中薦除冀州教授改
江陰路經歷累遷集賢侍
讀學士進御史

臺侍御史出廉訪浙西遂引年歸鄉人賢之表
所居為曹公里天歷初起使淮東拜陝西諸道
行臺御史中丞喟然曰吾年且八十尚忘知止
之戒乎辭疾不起天下之士高之至順三年子
震亨歿于常州伯啟徃拊之其明年卒年七十
九贈河南行省左丞追封魯郡公謚文貞所著
詩文有漢泉漫藁十卷子復亨所編士開弱冠
從學于李文正公謙其筮仕幕僚江南初定里

居鄉寓大夫士殷集公餘每與陸憲使屋史總
管孝祥陸文圭輩講磨義理詩咏酬答未嘗廢
滯府事也遭遇承平揚歷清望官轍所至多寄
寓紀述之辭如村居云露坐分藜榻郊行解葛
衣宿呂梁云澹煙新店舍斜月舊河山贈周可
山云立談千古意坐占一生閒嘉祥道中云積
水不勝流水碧遠山翻比近山青鄉飲禮罷次
諸公韻云十年人事成今古數老天留載典刑

除夜云去歲關心如昨日平明迴首又東風江
陰詠懷云山色秋冥知雨信岸痕齊剝記潮生
歐陽文公以為思致敏瞻襟韻朗夷臨文抒志
造次天成斯足以稱其為人矣

寄謝陸義齋廉使諸公

崢嶸古暨陽事簡風俗淳樸也一何有忝為幕中賓齊
瓜六見熟於今作閒身東畢事游息聯鑣出城闌時當
仲夏初萬木繁陰新眺覽悉幽勝主賓若同寅雲間陸

公子丰姿邁羣倫妙齡心老大富貴不驕人石居狀元
後累葉俱搢紳海翁文章伯子弟盡麒麟何有兩夫子
家聲德相鄰行樂興非淺杯盤夜及晨名園開錦繡品
饌羅奇珍晚入清涼界諸公禮極臻於菟亦無懼酒力
乃爾神處士葉其姓綠綺隨烏巾時聞操一曲天地還
氤氲歌調間南北手談棄疏親黃雲徧四野遐邇不憂
貧凝睇即成趣滿懷俱是春主人捧觴勸厭飫難為噉
斜日覓歸路蒼騰入踰塵夢覺思梗概擁鼻如酸辛倦

惓無以報作詩記天真

和傅荏山九日秋闈

宦遊何所得歲歲客殊方馳騫不自己別離是尋常
資身素無策返愧工與商光景一何速瞥然度飛黃瀛洲
良不惡復到澄清堂借問堂中人生平果何長夢想枌
榆社披襟坐蓁牀晦息存夜氣晨興玩天光云胡不歸
去老大徒悲傷秋雨忽開霽乾坤變清涼偶於職守外
泐檄監文場諸生競葩藻寸晷何倉皇藩臣喜揚激賓

筵秩觥觴秋陽暖慈闈春風遊帝鄉瓶中有紅腐穗博
太官羊

澣衣圖

靜女思歸寧澣衣拜高堂隱士履貞固濯纓視滄浪苟
有涓潔心顙顙猶姬姜常懷濟時策進退皆康莊

濟州登太白樓懷鄭從之御史二首

高城蘸雲根聊可慰心跡長風萬里來如對騎鯨客監
州好事者樹此樓與石隆鼻號金仙更長漫嗟惜

堂堂鄭使君美譽粲星文不羨草頭露願栖山上雲
罄躬事女冠無乃承異聞賤子抱負淺仙凡未能分鄭棄官師

女士號髮冠者

蕭縣道中早行

行行古天塹冪冪桑與梓樹枝防刺人天明僅十里功
名果何物白髮仍早起賴聞瀑水聲清徹畸人耳

休日陪漢陽諸名宿登秋興亭觴詠移時塵慮頓
息但以不得會仲通為慊因綴長句呈欽夫僉

司士元太守君平察推仲通宰公暨座中諸友
散材生世元無堪強持陋質偕梗楠年餘耳順雪垂領
誤承任使來江南公庭日午了官事西州散步成奇探
歲寒亭樹發秋興名公齒序相朝參鴛鴦梅梢欲蓓蕾
鳳凰山頂飛晴嵐江水朝宗淨拖練湖光照影清揉藍
旅鴈書空度荆楚浮雲護日橫湘潭蒼茫宇宙一俯仰
形役道路何癡憇移尊偉觀排小酌紫霞潏灩堆紅柑
人生擾擾有今日座客云云無俗談長安富兒不識字

但能几案羅肥甘眼中梵剎如比櫛焉知曉事無瞿曇
知音更有驄馬客威稜坐可懲奸貪山邊聖人惡旨酒
禹廟在側故云望之不敢成醺酣一襟清興豈終極催歸黃帽牽
羸驂漁歌悠揚風色暝人影散亂波光涵船開棹進一
迴顧怱怱欠到王公菴

陪諸公杖屨登梁王吹臺悠悠悼古之情不能自
已呈孟子周子文二友

天宇廓然秋已暮幽人欲作登高賦聯鑣沽酒上繁臺

千古興亡一回顧百鳥喧啾塔半摧荆榛掩映臺前路
黃花采采未成歡目斷荒城起煙霧

夜宿太湖岸

太湖西望如滄溟木落霜寒波更清聞道是中多巧石
明朝宣用勞生靈晚風作惡蛟鼉走搖蕩乾坤洗星斗
大隱乘舟不見人而今盜賊為淵藪

寄故教諭

風雨愁城楚江暮前人豈盡非常遇懷材抱藝儲琅玕

擊柝守閭司庾庫裏王抵死負靈均子敬無心事公路
我曹奔走漫赳赳紙篆科蠅友蠹

乙卯清明沅州郊行

信馬沅江江上路歷覽芳菲忘故步因逢古廟說前朝
忽見孤舟橫夜渡二難恨識十年遲四美豈期今日具
人生能得幾清明莫對殘陽怨遲暮

陪翟沈二文學歲莫登宴嬉臺

一雨開新霽長空絕點埃眼明初出郭心遠乍登臺

矮塔培黃壤，摧碑漬綠苔。
幾人遮日去，雙燕受風迴。
稚柳沿新塹，神祠映古堆。
翠峯依舊好，金菊為誰開。
日夕牛羊下，天寒鳥雀哀。
黃流隨去住，元氣接周回。
風箒誰操執，雲衣自剪裁。
松杉誠異質，樗櫟漫多材。
傲北衣冠變，平南士卒來。
功名殊未已，伏臘迭相催。
弔古情何益，哦詩愧不才。
歸歟風景莫攜友，且銜杯。

因飲張氏席上

故云

秋夜西齋有感

旅況隨秋變淒淒百感生白雲凝望眼黃鵠計歸程
襍臨邛服齋鹽漂母羹舊病雖少瘥新業竟何成
財匱交情淡門卑禮意誠淹留諳世態出入論家聲
眉鎖將詩解心田仗筆耕尊鱸張翰興燈火退之檠
雨積堪輿暝霜欺枕簟清天風篩竹響簷溜瀉階鳴
伏翼生憐暗飛蛾死趁明鴈鳴如有訴蟲語不知名
兀兀心猶醉栖栖夢亦驚鄰砧催薄莫樓鼓辨深更
日斷家何在年衰志未平自憐飄泊久坐起若為情

和陳愛山

拉友尋佳致迢迢遠市喧度山寧惜馬傍水得觀猿淨
盡羈人恨招回遠客魂樹頭參漢表石齒漱雲根植柳
人如在唵梅墓亦存風杉蒼晚節雨徑綠秋痕數畝栖
霞洞千年落照村誰憐丞相宅我愛故人樽叱道僧歸
寺還家僕候門賈留真有意誰可代晨昏

再和

酷愛西山景經年可避喧一聲何處鳥百樣此中猿地

雅僧成趣峯高客斷魂長藤梯藉力茂樹石黏根賤子
心君駭賢人手澤存水亭寒有素雲洞秀無痕古篆紆
清澗新圖挂遠村乾坤雙斷梗身世一芳樽戎角催歸
路吟鞭懶入門五年申浦住卜宅愧吾昏

初到江陰寄徐路教仲祥三首

自古江南地澄江小翠微訟清衙散早路僻客來稀
季子高風在春申故宅非晚涼無一事攜酒坐苔磯

自古江南地林泉勝概多扁舟波瀲灩羸馬路陂陀戎

金
卷二十三
服人爭笑吳鄉語漸訛茲游諒奇絕奈得倚門何

自古江南地民安樂最漂稻畦雲漠漠松晚霧森森鵝
鴨喧池水鷄豚憩竹林小舟維古岸銷我利名心

蘭溪郊行

千里飄零客雙親喜懼年馬嘶青嶂外人望白雲邊要
領知誰授舒徐頗自便此行羞伏櫪何必較夔蛇

夏夜露坐

露坐夜如何村居即澗阿蒼煙噴素月碧落轉銀河病

抑詩情減愁添睡思多秋風庭樹響勲業愧蹉跎

辛亥三月陪馬克修治書謁天游孫真人方丈階

前牡丹盛開卮酒同玩座中范提點索詩

拉友尋佳致琳宮引興長服膺思酒聖拭目待花王
逝水年華急行雲世態忙無因駐清景春色又斜陽

詠鴈

寒色波光秋影涵數行天字到江南銜蘆有為防矰繳
擇地無心入瘴嵐寒暑相催猶可避稻梁雖好不宜貪

哀鳴欲動何人意獵騎彎弧酒正酣

夜雨

老屋淙淙榻屢移披衣起坐候晨鷄
四簷急溜三江瀉一道寒聲萬弩齊
飛雪過窻開寶鑑震雷鼓物揭征鼙
平明點檢人間事流水溶溶漲小溪

暮春用唐壽卿韻二首

一天晴碧日遲遲暑氣蒸人力自微
幽徑雨餘芳草合小園風急亂花飛
卧思沂上歌詩去夢到山陰被楔歸還

憶去年乘小駿西湖遊罷北山園

流水年華去不窮眼看濃綠換芳叢半溪淺碧春前雨
滿地殘紅午後風客舍蕭條唯感物壯心寂寞漫書空
吟詩羨殺唐公子興在三山碧海東

就學東平嘉祥道中書事

行潦縈紆會古溪一行白鳥自高低
敝裘恐惹途邊棘瘦馬愁顛雨後泥
思入石林風浩浩吟成沙草日淒淒
相逢莫問經行地萬壑千崖總是迷

夏夜露坐

露下晴空釀薄寒
坤輿厚德載人寰
星光遜月明珠碎
雲氣停風白練閒
水鳥自搏空闊際
煙蚊常在有無間
兒童為數秋期近
書劍無成益厚顏

夢酒詩會

身世年來憶藉糟
華胥此夕賴薰陶
半窗涼雨青綾薄
一片春風翠旆高
烏蟻混遊槐國市
綠醅初發漢江濤
流鶯喚覺西軒底
箕踞分明指二豪

涇陽述懷

八月分司到縣
呈王仲瑗御史

晚境難期博望侯，微官且學子長遊。
涇清渭濁源何異，物換星移志未酬。
隴月照人征雁曉，金天飛露候蟲秋。
塵緣袞袞今猶古，唯有書生易白頭。

子規

蜀魄曾為古帝王，千聲萬血送年芳。
貪夫倦聽空低首，遠客初聞已斷腸。
錦水春殘花似雨，楚天夢覺月如霜。
催歸催得誰歸去，唯有東郊農事忙。

送翟慶之

書劍飄零二十年風流誰識玉堂仙
柳營一顧膺新命蘭室三生賦薄緣
以道自居元有地若人空老是無天
功名遲速皆前定莫使蘇生坐馬韉

詠懷寄趙君

鉛槧生涯二十秋無依如鵲拙如鳩
曾蟠子美千間厦氣壓元龍百尺樓
知命豈爭蕉底鹿興宗要遠夢中牛
壯懷磊落憑誰語時問東陵謁故侯

謝朱鶴皋招飲

里巷浮沈適自由
江城久住似菟裘
廣文活計貧無那
好客情懷挽不留
滿院竹風吹酒面
兩株榴火發詩愁
料應此外無佳致
人物相看總上游

舟至常德出陸由辰抵沅書事三首

盤礴崎嶇力不任
遐方風景變鳴禽
舟浮湖面波瀾闊
馬憩山腰澗壑深
千里曉烟炊紫葛
一春寒霧鎖青林
紛紛寇盜何時靜
龔遂登車是好音

蘭澧分歧望芷沅渡頭楊柳欲飛綿囊無惹以防私論
茶有茱萸敵瘴烟心定漸忘行役苦愁濃不覺歲時遷
從今暴殄為明誠曾見山頭火種田

武陵回首望已陵攢退舟師就馬程潏潏青溝穿路過
峨峨蒼嶺送人行廟堂任使誰能避箐麓猖狂只自驚

欲為伏波尋勝跡草間聞有鷓鴣聲

延祐中湖廣諸猛以前帥失馭西南

多擾伯啟為刑部侍郎承命偕兩臺御史本省參政賈馴蒞鞠之行次沅州道且梗伯啟曰進非兵衛不可彼諸番酋長萬一驚疑狙候為患不細若馳一介與之議靡不有濟衆然之乃遣監察御史揚鵬單騎詣之果得

要領以歸此三
詩即是時所作

南塘戲贈立齋主人

南塘幽闌似山林是是非非總不侵詩有靜功聯句好
坐無俗客話情深花枝徙倚閒居樂柳絮顛狂薄宦心
聞說主人村酒熟幾時攜杖一相尋

華亭道中連前詩寄盧知州王仲通朱文炳

茫茫廣斥望中迷地盡東吳土自泥寒氣襲人滄海近
溼雲當眼昊天低蕭條古樹旌茅屋詰曲清溝護稻畦

莫託鱸魚風味好月明聞鶴更悽悽

中丞敬公九日登真州南城以詩見示愛其閒逸
邁往之氣惜不得侍行想像和呈

四事難并舉世聞登高今喜夾河濱美哉陶令杯中物
老矣長安陌上人江限華夷晴浩渺山磨今古莫嶙峋
醉歸應被兒童笑猶有黃花在角巾

題伏波將軍廟

辰州

佐漢功臣矍鑠翁擇君不受子陽封椒房偶累雲臺像

意以還傷銅柱功幸自生前識朱勃不妨牀下拜梁松
五溪未服星先隕文叔端難比沛公

冬至日白霄道中偶成錄示朱叔茂郎中段惟德
魯子輦二都司仍希于張伯高參議郭幹卿治
書與兩司幕長及按郭郎中邢孟直諸公處以
區區薄況達之

櫛葉蕭蕭朔吹寒山行病瘦怯衣單馳驅一帶灤江險
髣髴重經蜀道難旅邸就牀雖自愧繡衣持斧要同看

窮途恰值書雲節
林酒糠燈語夜闌

河從封丘北尋故道所過廬里蕩然無遺壯木連

抱披蔽中流者強半泰定乙丑秋予自開封歸碭

山買舟神馬渡載書倒前領石而東湍瀑衝激

神魄駭動有不可形于言者因念年老親違歷

此艱險幸出坦途思警諸子遂述所懷寄衆友

桑顛榆蹶大河傾舟過陶波浪始平篷影學遮冠蓋道

槽聲如斥子孫名塞鴻已厭趨南北沙鳥誰知樂性情

想像故園松菊在為誰漂泊尚勞生

長安早發

夜氣溟濛塞兩儀客懷牢落動清悲月明宿鳥啼烟樹
風勁寒蟬泣露枝西北鄉關除夢到東南民力漫心思
路難無奈篙師促八月長安早發時

過長橋書所見

柳如青幟導姑蘇橋若垂虹飲太湖渺渺天光接波浪
淒淒秋色上菰蒲行囊只賸新詩藁身世端如古畫圖

獨倚危闌追往事
雁銜霜信下平蕪

遊西湖

鬱鬱羈愁暑不堪
畫船西出事奇探
柳邊和氣蘇公路
梅底清風處士菴
已覺湖山入胃臆
更容絲竹薦肥甘
錦雲一段三千頃
記取平生作盛談

遊靈隱

宮堯鷺嶺梵王城
秋氣平分寶界清
火宅久居心獨苦
雲林初識眼增明
禪關已被猿參透
仙洞誰教鬼鑿成

慚負半生泉石約
暫來偷暇洗塵纓

過白溝河

久聽人間說白溝
兩朝曾此界中州
而今六合無關禁
依舊潺湲碧水流

九日省舅氏郭西獨行因書所見五首

田家桑梓碧幢幢
過客鞭聲引吠尨
終歲耕耘竟何有
桑樞茅屋短蓬窻

霏微林霧慘秋容
撩亂山禽起晚春
營馬欲求糧已盡

二三癯老許年凶

浩浩陰風釀宿霾道邊佛刹記曾來
蒼花不識秋光老猶向桑陰密處開

遙空無礙日淒淒過雨平田尚有泥
極目斷鴻明滅處淡烟衰草一時低

豪家此日醉金樽驢背愁詩睡正昏
野雉一聲驚夢散蒼烟起處是前村

謝朱鶴皋招飲

石火能留幾許紅
人生南北馬牛風
春光倒指無多日
相遇休辭酒盞空

送張潤夫之遼陽簿尉


客途相顧足情歡
幾度青燈語夜闌
明日遽成離別去
因風毋吝報平安

九日月下小酌詠懷

賓雁來時燕又東
三年薄宦竟何功
晴窗偶讀登樓賦
昨夜家山入夢中

題宋成之畫馬卷

奚官珍重玉花驄
縱意清連碧草中
幸際四庭烽火靜
不須騰踏待秋風



元詩選初集卷二十三